

四庫全書

集部

欽定四庫全書

江湖後集卷四

宋 陳起 撰

趙汝錡

汝錡字明翁袁州人太宗八世孫嘉泰二年進士曾官漕帥有野谷詩集劉克莊跋云明翁詩兼衆體而又偏行吳越百粵之地眼力益高筆力益放卷中歌行跌宕捭刺蛟縛虎手也及歛為五七言則又妥帖麗密若唐人鍛鍊之作

征婦嘆

蓮浴雙鴛鴦梧棲雙鳳凰
雙蝶度牆雙飛燕歸梁倚
闌人顰翠忍淚心暗傷
閉戶羅幃悄孤燈耿空房
欲睡未得獨立理絲簧彈
吹不成調征夫天一方

訪隱者不遇

兩腋乘西風送我上高岑
竹根一泉通石徑萬木森
中有隱者居敗屋莓苔侵
山空人不見雲滿掛壁琴
兩鶴出候我逢迎啄衣襟
應酬久頗厭走避不可尋
誰伴山

下去明月升高林

姜子平鄭華父見訪留飲月下

敲門者誰子二豪姜與鄭揚袖入長揖掀髯略常敬于
時月當階籟聲斷四聽展席交股坐劇談飛舌競恃俠
爭譽已拈卷索分韻呼兒注老瓦酒力快辛硬羶葷屏
俗饌梨栗錯村釘杯行無不醅恐犯詩壇令

十一月四日雪中小飲是月十日冬至

書雲猶七日陰極剛未長風吹六花開飛舞隘雲壤一

陽方欲來和氣已摩盪著池寂不聲入林發餘響與客
同擁爐寒威不到幌洗杓開蟻樽下筯飯熊掌道舊驚
物變談空湔塵想近詩稍閣筆對此又技癢踏雪訪梅
花更覺吟興爽

雪中觀客夜博

積雪深一尺堆瓊迷山扉豪客夜排闥挑燈紅爐圍成
臬呼五白轉勝賽四緋舉觴無不嚼寒深酒力微姑置
博與酒劇談玉屑霏坐久更寢闌疎鐘到簾幃

晚晴與何尹登水亭簡張丞

溪流兩岸秋日落千山暮一亭壓其間登覽洗萬慮胸襟富丘壑方領此幽趣擲餌來潛鱗圍棋驚過鷺酒壺展逸興漁唱續遠浦安得哦松來撚髭同覓句

憩農家

似陰還似晴好風弄輕柔土膏春犁滑竹深鳴禽幽農家頗瀟灑漑漑清泉流寒予入茅簷解帶為小留荆釵三兩婦競將機杼投吹爐問官人肯喫村茶不羣兒窻

下讀千字文蒙求余因拊其背勸汝早休休
泓穎纔識面白盡少年頭耕食而鑿飲胡不
安箕裘迺翁聽我言急把書卷收遣兒出門
去一人騎一牛

尋僧不遇

捫蘿入石徑野衲棲其間杖錫知何處留
雲守禪關當戶走野鼠隔林巢白鷗候久
移晚照困來漱寒灣脩然非人世欲去且
復還木杪猿一聲六窓契山山

題下陽懷沈叔忱詩

夜雨曉方歇薄霧隨征車喬松二十里翠微三五家雙
燕教羣雛一牛馱兩鴉故人不可見回首天之涯

清明日同傅元瞻閻才元周濟美曾原伯宇文
子友宇文子英汪沖之王謙仲集櫻朱園分韻
得食字二十韻

宦情隨推移世事分限域帝城冠蓋會千里或咫尺賞
僚盡英賢了事即餘日念我契濶情招邀見懷憶春事
日光輝湖山好顏色徐行失前騎可望不可即徜徉大

堤上徙倚長橋側游龍眩生花意極反寥闌山房啟煙
扉僧話寄禪寂同來妙人物高論傾歷歷朋簪忽逢會
並轡隨休適將軍萬金園花竹照燕席高情發清曠絕
巖疲危陟俯視天壤間錦繡蒙山澤太平豈無象黔首
何知德須臾碧雲暮過羽杯行疾投林暝鷗還隔浦燈
火濕呼車各零亂紅燭明青壁良辰尚多歡整整三分
一後會儻相從前言未應食

寄遠曲

君馬踏邊塵繡幃妾一身仰天無過鴈俯水無遊鱗酒
難獨自酌蟻樽空浮春食亦不知味駝峯徒薦玆憶昔
送君君已醉醉言更戍一年事兜鍪北去幾寒暑兩地
肝腸摧萬里別來容貌似舊無寄去衣裳知到未折柳
絲絲紫塞心對花片片青春淚夜聞琴瑟鼓隣家人皆
齊眉老年華不忍恨君翻自恨長吁矯首天之涯幾度
虛傳家信息愛聽乾鵲怕聽鴉孤枕有時髮髻夢中見
覺來霜角咽梅花

昭君曲

禦戎豈別無經綸
婁敬作俑言和親
或結或絕患不已
至呼韓邪朝竟寧
稽首願得壻漢氏
秘歸有女王昭君
臨時失捐畫工賂
蛾眉遠嫁單于庭
玉容慘淡落紫塞
粉淚闌干揮黃雲
下馬穹廬行步澁
彈絲誰要敵人聽
年年兩軍苦爭戰
殺人如麻盈邊城
若藉此城贖萬骨
甘忍吾耻糜一身
聞笳常使夢魂驚
倚樓惟恐烽火明
狼子野心何可憑
嗚呼狼子野心何可憑

迎僊引

羽人窟宅壓滄溟崑崙閬風天墉城紫蘭絳節跨彩鳳
殷勤傳命邀同盟七月七日涼秋霽千官鏘佩森幢衛
王母雲車九色龍上元霜袍三角髻劉徹屏息迎兩僊
氈香塗門高馥天星裳黼袞自酬酢方朔窺窓不敢前
金漿玉醴濯凡腹紅顆絢飢蟠桃熟宴酣樂奏瑤池音
琅璈子登笛雙成乞憐請藥承華殿教戒丁寧先自反
三尸欲脫毋淫亂五性盡捨更勤儉各出數語鍼膏肓

此是長生度世方，徹心未悟益猖狂。
萬八千里周遐荒，少翁樂大誅相繼。
海外何日無方士，五柞宮中夢斷時。
銅盤玉露胡為不起死。

上馬曲

精神如熊氣如虹，夢寐思勒燕然功。
龍泉寶鞘橫三尺，犀甲茸條掇兩重。
鳴鏑飛空挾霜遠，認旗貼身颭日紅。
玉轡繡鞍鞚駿馬，眼有紫焰炯雙瞳。
誓縛單于獻天子，離觴不揮兒女淚。
笳鼓動地歸來時，金印斗大肘後繫。

君不見燕頷虎頭班超侯萬里又不見風聲鶴唳謝玄
破淝水

去婦詞

入得良人門自誓終此身掃室擁箕箒進盥躬盤巾採
桑趨壠首薦蘋潔澗濱十年盡婦道唯恐堂上嗔上和
下睦本無事一二小姑恣蕪斐浸潤既深貝錦成不棄
不出譖不已良人繾綣涕漣漣父母之命安敢違舉頭
天邊指缺月暫缺須有團圓時君不聞章臺長條依舊

垂樂昌半鏡還復歸

遠浦帆歸

晚日放晴雨脚收
楚山千里江吞秋
上水風生荻花渚
漠漠幅蒲天際浮
輕雲驟掩目力斷
雲消似過芳洲半
危檣逐鳥惟恐緩
燕子爭飛先到岸
嗟此何景兮遠浦
帆歸丹青欲畫殊
堪垂

蒙泉行

二十年前客中都
壁間誰掛蒙泉圖
天造地設有如此

果若所畫疑蓬壺御風來遊洞庭北此境突兀眼前出
荆門之外天下稀翻思畫圖纔髣髴山根寒源月一泓
細流循沼曲折分天光倒影瀉晴碧對此說我瀟灑心
雲木枕崖影濕翠金蓮鋪鏡葩在水流觴自是摹蘭亭
山陰今日那得爾向暮深林啼子規柳花作團貼水飛
吟興未盡征馬嘶他時清夢猶見之

馬上口占

平林塗烟山擎日晚征漠漠客條集浮生隙駒忙裏過

虛名塞馬眼前失古來戰場莫回首一成一敗骨俱朽
柳岸人家搖酒帘不妨小停春風鞭

漁父四時曲

春

霽江浮春新水肥粼粼鴨綠春風微波心上下舴艋滑
釣車香餌卷落暉纖鱗噉喙錦穿柳半留賣錢半換酒
爛醉茅欄紅杏家折花簪髮把兩手沙岸尋芳青驄嘶
彈絲吹竹挾蛾眉笑指漁父何寂寞漁父掉頭我自樂

夏

烟溪流碧浸炎空
滌濯袪蒸薰
葭風大港小港涼
世界隔堤荷蕩香
到篷儂家生長舟
一葉豈識人間半
點熱青笠綠蓑山
雨來雨過波平
夜撐月水亭避暑
冰玉肌枕設珊瑚
簾琉璃笑指漁父
何辛苦漁父掉頭
渾不顧

秋

新雁銜秋訪水涯
分屯洲渚傍蘆花
停橈相釣結溪社
來往無嫌同一家
酒酣把笛吹村曲
聲曳蘭花入山腹

釣竿到手萬事輕孰是孰非孰榮辱江樓邀月粉黛濃
簪璫嘈雜徹桂宮笑指漁父何冷落漁父掉頭我豈錯

冬

六花坼凍雲模糊釣鉤空擲寒無魚繫舟枯柳歸茅舍
撥火煨薪擁地爐賒鄰一榼醅酸玉老稚分霑春回谷
重來解維放夜筒橫風打向別港宿溪館對雪歌妓圍
釜出駝峰酒羔兒笑指漁父何顛顚漁父掉頭但稱醉

古劍歌

洞庭湖魚人得古劍於網中張倅得之以遺
余時開禧丁卯春館於岳陽樓邊事方急

洞庭吞天天無風月印一鏡星涵空波心千尺光五色
漁人嘖嘖疑垂虹睨而視之寂不見舉網下罩追遺踪
須臾雷轟怒濤吼鼓蕩六合霧溟濛所得非魚亦非龍
炯然三尺貫當中肉銷骨立精氣融鏗鉤其聲韜其鋒
越砥稍稍如磨礪壯士見之肝胆雄雷煥已死不可起
有誰解識斗間氣人疑龍泉或太阿萬古凡劍空一洗

倚樓西北望邊城連月亘天烽火明隱憂枕上思請纓
夜半躍鞞床頭鳴夢中見告若有神吾價豈但值百金
吾勇豈但敵一人知君素有擊楫中流心誓當助君報
國萬里清烽塵

廣寒遊

九秋半矩月團圓瓊瑤世界夜氣寒羽士躍身導阿瞞
麾斥八極青雲端老柯擲桂香不死銀橋跨空一萬里
飛步抽簪扣玉局中有素娥三千人綠瞳剪水鬢堆霧

風卷縞袖條脫露琅璈雲笛廣庭舞笑乘白鸞弄蟾兔
歸裁仙曲作霓裳天音盡洗凡絲簧霞裾星珮羅兩行
玉環垂手春風揚樽前盡日看未足絳膏泣鳳夜繼燭
宮商忽變不可聽馬嵬斜谷雨霖鈴

楚觀歌

吾聞楚鄉江山多勝處今之楚觀尤得江山趣萬象排
拶索應酬丹青閣筆無所措大則湘水小臨蒸衆流合
派銀河傾陶寫秋氣浸明月夜波爽透百雉城右則鴈

峯左右鼓雙屏競秀蒼龍舞吞吐嵐光飛亂雲涼風暝
送兩崖雨江山之趣于此無不宜朝暮變化愈出而愈
奇最愛鷗鷺甘冷淡占斷汀渚供娛嬉東塗西抹晚煙
翠漁父歸舟卷釣餌鼓枻而歌倚半醉中有滄浪濯纓
意杜若一片迷芳洲凭欄懷古生新愁更上崔嵬千尺
湘春樓縱目乾坤盡見衡嶽秋

原注楚觀在河南憲圃
湘春樓在楚觀之後

蝨

蝨形僅如麻粟微蝨毒過於刀錐慘上循鬢髮貫紺珠

下匿裳衣綴玉糝呼朋引類極猖獗搖頭舉足恣飡啖
晴窓曉捫屢遷坐雨床夜搔不安毯急喚童子具湯沐
奔迸出沒如喪膽童子蹙頰代請命姑責戒勵後不敢
念其昔日到光明曾遊相鬚經御覽

三珍行

聶西清遺以東坡書工部夏夜嘆蜀人趙雲
子畫李杜及素琴一張作三珍行

西清平生雅好奇夜則忘寐晝忘飢搜今挾古竭心力

常恐世間一物遺雲霧軒窗煙月戶萬寶彙列牙籤垂
循環邏視日千匝拊摩拂拭心融怡驚冠披猖變倉卒
六丁下取留毫釐收拾售用自不足尚輟三珍贈我為
六幅之珍老坡字印可誰氏參寥師怒鵬九萬氣吞吐
驪珠百二光陸離兩軸之珍雲子畫李杜跨蹇將何之
華陰縣裏過門日浣花溪上尋春時一張之珍太古琴
孤桐斲削嶧陽枝刻石漱玉世少比較昔響泉彼堪嗤
銀鈎鐵畫貴楷正此則倚醉飛蛟螭寸馬豆人貴纖密

此則縱意隨藩籬金徽玉軫貴音韻此則得趣絕絃絲
天機皆由胸襟出妙處莫以形跡窺愛茲三珍每自隨
酒酣呼驢任倒騎抱琴委轡烏角歌琅然高吟夏夜詩

荊門行

原注開禧丁卯被
機相視荊門關隘

去年曾問荊州途鷄鳴犬吠民耕鋤搖鞭重來意慘淡
前日井邑今丘墟雲昏雨溢初堆碧四野荒荒人跡踈
深山扶攜皆露處骨肉蕩沒况室廬老農無力倚牀卧
少定舉首來向余官人且坐待儂說未說涕泗先橫裾

老夫老豈識兵草忽見遠近皆狂徒懸崖絕壁魚貫進
飛馬上下爭馳驅吾軍非是無身手未鼓棄甲先奔趨
時平廩帛官不計戰勝爵賞官不辜進怯鋒鏑退焚掠
兵既難堪堪女乎歸來未暇正其罪官有金帛還招呼
老夫莫曉軍旅事但聞敗衄深嗟吁我聽其言為蹙頞
含淒獨下西山隅金蓮似恨羶風風染蒙泉未洗血水污
九秋半破明月夕照我孤憤行繞壁天子嘗膽方側席
微臣敢作楚囚泣秋風一斂樓蘭國

送奇仲過雲川

少年湖海氣近又負詩名今忽擔簦去誰非倒屣迎雨
茶煎顧渚春酒醉烏程有句茅亭著蘋風洲上生

劉幹東園

築圃非容易經營二十年煙松迷五鬣風柳起三眠疊
石連山麓栽桃擬洞天最為瀟灑處正在竹林邊

拍欄

偶把欄干拍沙鷗水上驚晚紅殘照在秋碧遠山橫盡

被浮名役皆從妄念生不如歸去好杖履老柴荆

小山寺

披霧入野寺寒林響朔風更無僧出迓山鳥若為通松
露染衣濕巖花照眼紅塵緣聊可息歸騎莫匆匆

避暑

炎赫無逃處如何得雨來雲生應有望風捲又還開攜
簞尋池閣傾醪注晚杯堆盤粲紅顆味不減楊梅

宿古寺

黃昏投寺宿古屋瞰荒江村酒沽春甕山房耿夜缸灘
高聲撼枕月落影收窓僧老人皆玩樓鐘曉未撞

雷潭寺

憶昔登臨日今經二十年崢嶸新棟宇黼黻舊山川魚
響潭翻浪鳥飛風送船穴空龍已去鱗爪跡依然原注
寺傍

有龍窟鱗爪
之跡尚存

舟中

離家俄十日千里獨衰翁蓬響過雲雨帆開逆水風新

沙增岸脚小港隱蘆叢客思難消遣黃昏月一弓
繫纜停征棹斜陽古渡頭風霜先遠客天地獨扁舟
水鳥衝開浪汀鴻占斷秋在家貧亦好何用出林丘

題化成巖二首

命友化成巖同尋頃刻閒半途瞻佛塔數里入禪關
松動影移石江清波漾山衛公讀書處有鷺宿其間

原注有李

衛公讀書堂公

集中載白鷺賦

一線公崖路衰殘步履遲攀蘿衝霧上倚檻俯空危石

佛像須久山僧言不知看來衆亭子最是妙高奇

日融

日融風力軟曳杖獨逍遙蜂去花心靜鶯遷柳影搖一
年春易老兩鬢雪難消客至時留飲無緣特地招

秋夜懷歸

鄉里千山月塵埃兩鬢星秋聲雖是爽客耳不堪聽多
淚風前燭孤明竹外螢吟蛩更無賴終夜幾曾停

訪鄭隱君不遇

行盡樛林村柴門閉夕曛自來松下坐間想壁間文守
樹猿偷果窺山犬吠雲多應尋鶴去祇隔暮溪濱

晚興

是處牛羊下喧譁走牧童霽煙拖淡碧夕照殞殘紅老
鬢日添雪衰軀晚怕風愁來無著處分付酒杯中

登法雲寺

雲林擁深寂山寺倚崔嵬童子請先坐老僧恐便迴庭
黃霜到橘堦綠雨滋苔掛樹猿相玩呼之却不來

招賢渡溪閣晚望

溪流清到底十頃浸秋光煙重山加色風強雁失行塵埃雙老鬢天地幾斜陽何處一聲笛征人暗斷腸

同子嚴初夏飲山閣

綠陰千百頃約我共登臨山翠含煙重榴紅著雨深行藏皆有命計較漫勞心病怕杯中物憐余淺淺斟

夏日普信寺江閣

到此全無暑虛闌千里風看飛雲度水聽落石鳴空日

月忙烏兔春秋遞燕鴻一生塵裏過煙艇羨漁翁

江閣夜

小閣臨江迥疎簾帶霧鈎雲鴻遙影滅灘月碎光流詩
思偏宜夜衰髯不耐秋漁燈三兩點隱隱荻花洲

醵飲劉園

隨意攜盤饌毋煩事禮文燕飛衝幕過鶯語隔牆聞興
自樽前發韻從花下分詩成似供課醉墨競紛紜

清明小飲

草草清明飲惠風天氣和身輕梁燕舞古巧柳鶯歌但
道三春好其如兩鬢何升沈付杯酒由命不由他

春郊

數點綠楊風春光處處同蜂喧搜藥瘡鳥鬧聒山聲聯
句逢詩友尋僧問牧童家家辦農具準擬試新工

臨川縣治古桂兩大株與葉潛仲鄔文伯飲花
下

雙桂相傳久百年殊未衰樹聯鋪葉密根老著花遲葩

墜粘詩筆香濃透酒卮月中但孤影安得兩交枝

倚樓

蒹葭秋色晚百尺倚江樓日暗煙藏寺風高浪拍舟歸
雲投遠嶺飢鴈叫滄洲心事非年少塵埃白盡頭

到農家

難得官人到茅簷且駐車自攜鋤掘笋更取網求魚一
媪來斟酒諸童競挽車須臾對吾泣科役苦追胥

舟泊

舟泊似差早篙工愛酒坊羊羣歸遠隴柳影戀斜陽澤
國人千里暮霞天一方茶多不思睡漁唱聽滄浪

前頭無泊處且住荻花林水沸知灘淺煙蜂花在瓶呼
童治茶具客扣柴扃共說山林話休嗟兩鬢星

維舟

望見人家了猶須轉一坵寺從山背出船向柳邊捎問
酒尋溪館呼兒解臘包三杯亦徑醉無事且權拋

訪曇師

道人雲外住小徑入庵幽
榦老梅逾瘦林疎竹自修
揀茶相伴煮補線且停抽
此事如何說下山歸去休

贈慈上人

踏遍叢林後歸來隱石崖
任梅斜到牖聽竹長侵堦
掛壁塵堆笠穿山雲惹鞋
真機須我悟餘事是持齋

空師欲遊嶽往訪山寺

聞師遊嶽去打急訪高岑
躡屐若來晚挑包不可尋
山寒梅意悄林茂鳥聲深
行住無非道何須枉費心

送上人歸閩

頂笠遍參請平生志甚勤耳方離嶽瀑眼已接閩雲宿
嶺星辰近渡溪煙霧分勸師早休歇禪不在多聞

雪中尋僧

尋僧閒踏雪握手上鐘樓初下寒飄屑纔濃風輟毳水
波糊紙閣春乳泛茶甌片片看來好龐公有話頭

寄圓老聞欲移住他院

妄動生于念禪床坐不牢舊窠元自好新刹又何高去

住身如寄奔馳足漫勞挑包聞已決應笑我忉忉

送聰上人歸四明

辦得四方遊孜孜討入頭歸雲起齋鉢高浪送行舟笠
戴天童雨鞋穿雪竇秋平常心是道莫更問人休

過寶雲寺訪密師

寺纔三二里曳杖且徐行晴塔松梢見風鍾嶺畔鳴樵
夫分道過僧子就房迎竹有千竿立塵無一點生

送仲兄之京口

纔歸又東去且道幾時還
筭路亦差遠緣君不耐閒
江城登鐵甕煙寺認金山
我昔經行地詩牌掛壁間

題崇真觀東軒

東軒面水枕山阿左右雲
烟濕翠蘿風度鶴聲聞
遠壑日移松影轉前坡
愁來獨靠清樽遣老去
休憎白髮多道士罷琴
揮醉筆詩成自喚小童
哦

題戴洪甫愛竹軒

竹癖難憑俗眼看
琴書靜對翠光寒
秋聲鳴屋風初度

夜影翻牀月半殘
天乞幽人供嗜好
日呼稚子報平安
窓前幸有閒田地
分我雲梢四五竿

同趙尉飲江亭

草草三間兩眼明
數峯如畫一江橫
風烏破浪帆檣急
野鷗過林鳥雀驚
蟻取浮筍尤有味
魚方出網正宜羹
流鶯憐我無歌者
簧舌頻翻柳上聲

題合江亭

石鼓山頭一小亭
乾坤萬里眼雙明
雖因刺史能尋勝

不遇昌黎豈得名衡嶽雲開秋洗碧蒸江湘合水爭清

書巖莫辨當時字空積塵泥野草生

原注昌黎有題合江亭寄刺史鄒君

詩末有願書巖上石勿使塵泥浼之句

梅

園名金柅多奇卉古幹靈根獨異常耻與春花爭俗艷
故將雪質對韶光天葩巧削崑山片露蕊疑含建水香
當為君侯好封植角弓三嘆誓無忘

茶罷

茶罷晴檐唱午鷄偶騎驢去過東溪酒餚分倩樵夫挈
筆硯專令童子攜放目水亭欄獨倚題詩僧舍壁新泥
興闌歸問來時路到處蟬鳴日已西

史鎮江句祠得請仍進職

兩載南徐屈從臣笑談樽俎運精神民無木土絲毫費
手挈江山表裏新千里舳艫渠水利一團錦繡閭風春
夾河柳接甘棠影下有攀轅卧轍人

原注築閘疏渠終
河葺圃百廢具舉

盡出
公費

帝念承流欲報功力祈閭闔請琳宮固知槐鼎身將近
却愛蓴鱸味不同寶閣風雲雖學士滄洲烟雨且漁翁
到家宣室思前度又使猿驚蕙帳空

原注史自
號滄洲

午炊徐坊嶺

途長力困時時歇日影將終僕馬飢糴米荒年增價售
汲泉遠井得炊遲竹稠亂笋穿開路藤茂多花蓋盡籬
飯了店翁相送出丁寧前面小橋危

避暑溪上

不堪蝸舍暑如炊何處清幽可杖藜未約客須先覓酒
要尋涼必去臨溪撐船訪洞林間港坐石吟風柳下隄
晚網得魚似湖白鷺刀鱸玉擣香虀

雪徐廣文招同官小集分韻得明字

瞰江亭館約登臨雪後憑闌景倍清波面玉虹千丈霽
塞邊冰鏡十分明放懷共恨添杯少分韻俄驚擊鉢成
對奕不知誰勝敗醉中但聽子丁丁

宿妙果寺贈洪上人

上人留我禪房宿煮笋烹茶語夜闌鐵馬鳴風山牖寂
木魚敲雪曉廊寒真筌但要此心悟公案休將故紙鑽
若道吾言沒滋味請師且去坐蒲團

晚征

回首家山已十程搖鞭自嘆苦勞生雲先帶暝巖邊宿
月獨伴人溪上行草屋倚驂難可意杏翁叱犬不容聲
明朝路遠起須早第一鷄啼是五更

途中

雨中奔走十來程風捲雲開陡頓晴雙燕引雛花下教
一鳩喚婦樹梢鳴煙江遠認帆檣影山舍微聞機杼聲
最愛水邊數株柳翠條濃處兩三鶯

宿江閣

閣前眼界如圖畫山色侵窓竹打簷雲帶鴈聲移別浦
月將梅影進疎簾壯懷自笑年年減華髮無情日日添
夜半驟風天驟雪貴家鼓舞客心嫌

春眺

獨倚危闌春意遠本無情緒強登臨一眉晚掃晴山黛
萬縷風搖岸柳金久負故園泉石約恍驚老鬢雪霜侵
兩年雙腳數千里奔走塵埃損道心

訪黃簿留飲

愛靜移家住水南門排古木枕寒潭鶴翎漸長呼童翦
塵尾頻揮對客談旋切銀絲膾鮮鯽新嘗金顆擘香柑
惜予戒飲難陪伴舉白掀髯子獨酣

釀飲

出城二里野人居最愛園亭傍室廬墨湧晴池聚科斗
雪明碧嶂過春鉏興來醪友尋詩酒忙裏攜盤但醢蔬
新舫小軒尤更爽百來竿竹間樓櫺

黃幹見約小飲就宿

病後何人慰寂寥長鬚持簡忽相招溪山見說為樓爽
杖履寧辭去郭遙柳絮一天晴舞雪松聲十里夜聞潮
談詩直到疎鐘動酒困頻將茗椀澆

郴州鹿鳴宴

連科已占十名前行聽鴻臚第一傳我俟合符留勸駕
君能摘藻預興賢湘山點化名千佛柳嶺飛昇儼九仙
此去瓊林天上宴今朝先賦鹿鳴篇

原注柳人事湘山佛及有馬嶺蘇仙

上昇處號
九仙一佛

次韻袁州鄭守鹿鳴宴

詔增貢籍自端平大比賢書拔衆英學備六經俱里選
賦推五色以文鳴雖由黃卷能勤苦皆藉朱旂與作成
來歲錦標先奪得天街聽唱狀元聲

原注舊解九人經
五賦四新制增取

二人經六賦
五六經遂備

題村舍壁

柔風十里日曛曛
雨後陂塘野水通
兩岸柳煙籠曉綠
數枝桃露滴春紅
明知鐘鼎衆皆羨
到了山林味不同
田父殷勤邀我坐
一盃白飯一盃松

早征

店鷄一唱接疎鐘
起整行裝尚夢中
沙路踏殘征馬月
柳隄啼斷曉鶯風
水肥渡險添舟子
岸沒途窮問牧童

千里鄉人逢陌上片時握手各西東

杜宇

纔聽今春第一啼如何便道不如歸聲穿窓隙驚歸夢
血溜花梢濺客衣叫斷寸腸誰接續懶隨羣翼戀芳菲
田園荒盡腰猶折我亦因君覺昨非

訪別胡倅留飲水閣

故人知我已膏車折簡殷勤屬訪渠惜別怱怱留語笑
臨時草草治餽蔬密遮池面荷千蓋斜插雲頭月一梳

此夕凭欄又何日鴈來莫惜數行書

田家嘆

破屋三間結草扉柴根煨火合家圍此生能得幾年活
薄命連遭兩歲飢腸久鳴雷惟淡粥體雖起粟尚單衣
晚來稚子多歡喜報道小姑挑菜歸

沿溪宿虎山山家

高低田水曲通池小小人家短短籬杜宇教唆春去早
陰雲遮蓋月明遲年年只解催教老公事從來了是癡

若不隨緣強煩惱漫添兩鬢幾莖絲

苦吟

幾度燈花落苦吟難便成寒窓明月滿樓上打三更

山寺

樹暗常疑夜山多易得雲撞鐘最深處嶺外不曾聞

吟髭

壯歲髭如漆年來暮景侵更令如雪白撚斷不妨吟

漁舟

秋巘翠千疊晴溪玉一灣漁舟三兩箇來往釣其間

出郊

二月垂楊岸行春詩酒徒蒼頭前引道拄杖掛葫蘆

題莊舍壁

水深荷較晚地僻草偏多佇立風前聽樵夫隔隴歌

登樓

地卑梅雨濕氣壓篆烟低孰是披襟處高樓百尺梯

夏日山中

瀑近書皆潤林深簟更涼山中無一事夏日覺猶長

贈定上人

談禪皆是病參請不須忙且看諸尊宿相傳甚藥方

讀離騷

琅然醉讀離騷經一鶴聞之來中庭童子屢麾不肯去
直湊樽前側頂聽


溪上

一番雨過驟晴時溪上春光色色奇日煖花繁蝴蝶急

輸官尚欠二斤絲

倚欄

倚欄有恨無人說
暮角吹梅寒聲咽
急風捲雨過鴻驚
吐下蘆花一枝雪



江湖後集卷四

欽定四庫全書

集部

江湖後集卷五

六

詳校官庶吉士臣朱理

助教臣常循覆勘

謄錄監生臣馮克鞏

欽定四庫全書

江湖後集卷五

宋 陳起 撰

鄭清之上

清之字德源號青山慶元之鄞人嘉定十年進士原名炎字文叔從樓昉學史彌遠薦為魏憲王府教授理宗嗣位以定策功累拜太傅四登相位封魏國公致仕卒贈魏郡王謚忠定端平中召還真西山魏鶴山諸君子時號小元祐皆

清之力亦南渡賢宰執也有安晚堂集方回
云初江湖詩獄之興史彌遠議下大理逮治時
鄭清之在鎖闥白彌遠中輟而陳起僅流配則
起之刻是集蓋感之也按安晚堂集六十卷起
所刻者十二卷末有臨安府棚北大街睦親坊
南陳解元宅書籍鋪刊字一行今世所傳者缺
五卷惟第六卷至十二卷存今葺自永樂大典
者分為二卷共詩一百七十九首乃起所選入

江湖集者也

妾薄命

妾有一片心
奚啻金與石
金石尚可磨
此心終不易
妾有金錯刀
不買珠與翠
一笑向尊前
願買郎心醉
娟娟桃李花
東風蕩柔枝
見郎郎弗顧
掩面啼春閨
不關郎意惡
自悲妾命薄

江漢亭百韻

山川自高深
開闢由邃古
長江瀉岷峨
橫亘截區宇
東

流為汴津疏鑿仗神禹襟帶成輿區都會稱鄂渚環城
得脩岡雄勝著臺府上有江漢亭憑高欲騫舉雲巖
左方南樓以為輔飛甍立雉堯纔去天尺五星辰近梯
級嵐霏日吞吐橫陳極蒼茫萬象互昂俯晴光敞雙明
景物恣枚數炊煙接空翠下列十萬戶櫟棟出稜角闌
闌分脈縷川塗競走集水陸跨重阻東南引湖湘西北
控淮楚舟車所交屬人物森萃聚歌謠雜諧合來往紛
偃僂溟濛塵蔽空揮霍汗成雨游蓋驚雲飄聯轡識驂

舞驅馳溢阡陌時節相媚嫵裾袖翳朝日光曜燭綃組
憧憧蟻遷穴紘紘靈抽緒亭亭肆遐睎一一可細覩至如
城中邊萬竈宅貌虎春秋謹教閱什什而伍伍紅旆羅
旌幢中軍立旗鼓冰霜貫戈甲雷霆震弓弩後先嚴車
徒坐作中規矩被廬猶晉蒐少長悉有序禮成既飲至
絡繹還所部俯瞰了不遺清流數魴鱖乃若天空澄江
色入環堵雲水渺相接斜陽落晴塢千艘卧平沙片帆
歸遠浦微茫泛一葉咿軋響雙櫓報譚認檣烏航琛知

海賈微陰轉層巒輕煙生宿莽棲鳥絕重瀾歸鴻集寒
嶼夜深漁火明孤洲記鸚鵡晴陰與朝暮景色若誇詡
方春及韶淑鶯燕爭鳴乳桃李出新粧周張環繡黼脩
眉橫柳堤遺鈿錯花圃孟夏薰風來草木自蕃穠翠幄
帷清陰密葉覆幽墅入林梯空旻影團修月斧露掌逼
高寒金波沃肝腑隆冬雪紛飛瓊樓耀江潏萬花著林
端是不分細鉅茲維四時媚代謝聽寒暑榮枯雖異撰
去來莫追拒彼動此靜觀羣魚沸鼎釜紛綸各狀態天

械發機杼或如懷袖物俯拾恣所取或如海陸珍搜羅
寄庭廡或如觀大駕旄頭先鹵簿或如親校獵王虬挖
翠羽或富若武庫寶物窮積貯或麗若上林鳥獸羅禁
籟或紆若綺縠或列若簏簾或背若相違或進若相與
或翦若興雲或林若率旅或驚若脫兔或拱若禮鼠或
若難出塹或若馬奔圍或變若龍蛇或怪若獬豸或奮
焉若讐或比焉若侶或矯若怒嗔或偃若戲侮或騰若
羸餘或匱若貧窶或聚散翕忽或縱橫旁午或禽聲呶

嘯高下參律呂或人語呌噪歷落寫管管或以琴置膝
絲音宜搏拊或時棊滿枰石韻雜珎瑤或歌枕高眠胡
蝶夢栩栩或相對吸茶舌本躍清語或暇日觀書腸腹
自撐拄或乘興飛觴醉後忘爾汝或即境揮毫圖畫入
縑楮造物無盡藏儻來亦何忤俛仰已陳迹恍惚失處
所達觀萃茲亭宇宙一秬黍斯亭名者誰儒林得鼻祖
昔賢維南軒心學紹東魯睠焉西南遊芳洲擷離莊遺
墨尚淋浪隸刻照亭柱邇來三十年軒桷漸頽窳堂堂

魏國孫王節蒞茲土英聲凜荆揚盛事踵遐武曾侯廬
陵秀一笑不齟齬風月喜平分江山藉宗主興仆追前
修遺蹟游蒐補飛翬抗雄梁石花呈古礎荒榛得奇觀
幽思發新杼公餘多勝槩往往歷諸庾賡酬駕元白光
燄陵李杜領客共落成而我亦同俎半生嗟鏤冰一字不
堪煮樂事紀末顛鴻筆媿燕許吾伊補書債欸乃效漁
父儻繼竹枝詞編入武昌譜

鄭德言親覩洛迦觀音相遂依所見繪畫朝夕

嚴奉且求贊語敬題其旁

具足圓通性一念本昭徹佛我與信心是三無差別凡
人未見聖如渴以河說佛身忽現前如水印秋月心精
自開遮見根匪優劣念中有大士珠嬰百寶結補陀洛
伽相自在猶日揭是名為正觀倒想作奇絕稽首圓通
尊茲念無起滅非相亦非念不盈復不闕唯然觀自在
無眼耳鼻舌

送繼一郭處士

聖君如堯舜豈無巢與由計然亦何慕五湖一扁舟之
人久不作側席思巖幽嘗聞鹿何君清芬徹凝旒重華
錫嘉號見一光林丘誰謂雅道息競風日悠悠脫冠掛
神武有士歸東州笑將金閨籍猛博處士裘釣天為開
顏曰此夷逸儔大書繼一字虹光燭奎婁宸章軼麟袞
正聲出天球清名獎靜退下視古素侯睿謨廣先憲姱
節追前修況今輯衆雋丞弼登虞周明時樂閒暇出處
自不侔赤城宅仙子登陸方蓬洲君歸訪司馬坐忘春

與秋方瞳照綠髮戲轉黃河流煙霞肅逋客隱者應輟
耰歟乃輔行色春風生柁樓

孟童子中異科而還來訪余於行都賜第輒贈

以詩

在昔昌黎公序贈張童子獨出超等夷芳名駕青史君
門藹世勲覺軼西平李宗社方同休彪炳見孩稚天庭
插犀角星眸炯秋水誦書如焦琴高下涵角徵朱門共
駭聽洗此箏笛耳老翁欲答兒眼看拾青紫一朝聞九

關賚予出周籬我朝晏與楊炳炳貴名起願子志遠大
勤學踵前軌家尊我相知作詩贈歸騎

正月晦夕夢中作偈覺但記其首兩句遂於枕
上足之錄呈慧上人

是身本虛妄覓主了無得誰知日用間顛到由六賊茫
茫前後際生滅在空色賊去主人歸渾家不相識

因筆記賊入空室頌

平生一片癡妄意室中物自言富可待到了貧徹骨一

宵入人家百寶認髣髴揀得真金身明處是泥佛

惠墨

老龍卧蒼海千年抱明珠神禹決淮泗偃蹇不受驅怒
走崧岱頂風雨撼八區亭亭立天柱化作青松珠蟠根
蟄九地融液如流酥磷峒脫支節幽人拾肌膚虹光夜
穿屋盍突明膏腴芳薰漸凝漬玄霜出承壺糝以丹鳳
髓摹以青龜趺擣以明月兔曝之暘谷烏或潤似玉玦
或堅如金觚六丁下取將香藹流清都絳闕注僊籍白

日飛凡夫借問何神靈黑質分龍軀于將昨已至莫耶
復來趨二龍適膺合變化尤其殊君看一滴水雙雙躍
天衢

和葺芷應直院送秋蘭韻

大椿凌千秋靈芝競三秀書傳述誇詡垂芳古今宙貴
耳但奇奇相馬失之瘦誰知楚醒花遠避漢金耐擇交
得素節彼哉懷春誘夫君全德馨內美本吾有姑置芝
與椿秋蘭歲相壽

東湖送藕與葦並

草木雖無知葉落能糞本榮枯遞乘除
苗實自穠穰東湖百頃蓮夏日傲趙盾
州家浚河渠獼獼甚耘壟長身萬柄荷
髦梗付鍤畚寒煙熨青鏡時有白浪輓
水解毓仙骨根着泉源混外乾乃中腴下
益寧上損淤泥胎玲瓏多節竅渾沌園丁
亦善沒擘波沸魴鱖象株忽仰浮登岸殊
袞袞誰知絳縣塗可試平叔粉名非玉井
船實過秋蘭晚殺藪雜燕豆殖菜補中壺
交梨能養生護草

亦忘愆空言出好事孰與津燥吻贈君擬條冰差勝羞
藻蘊

林治中鄭廣文以詩來遣魯酒報聘拙語輔行
長公本喜飲半入野人腹南洲春夢婆亦復開醉目尚
想晉流麗鬢飯更升木興來索老兵誰謂酌可獨我亦
愛客至陶巾時一澆雖有彭澤田種秫若不足頗因病
入務瓢棄尚餘綠豈無大雅朋來伴離騷讀廣文餐簷
花和靖時修竹交情如耐醇秀句喜心沃觴政寄卜夜

談閨屢更僕胡為閔宇芝但憶顏山玉聊爾遣書瓶安

得洗愁斛昔誇聖人中今愧平原督原注今歲家釀殊未佳杯手

助持螯車涎笑逢麴青州豈烏有白衣問黃菊如臯應

解顏對飲頗勝俗原注梅聖俞詩獨坐與婦飲頗勝俗客對何時赤壁游

樽笑相屬欲歌鹿鳴三正若龜藏六飲肯遺公榮雨煩

過御叔忻聞麥雨岐況有魚百族小卻揖二豪觥船倒

醺醺

謝玉泉君黃伯厚和韻

卯飲貪引卮夕食不厭腹松醪灑玉池鬱尊傲黃目歸
閒喜攜幼欣榮對夏木頗笑屈原醒寧甘馬周獨詩筒
發豪思江月欲戲澆每賡北海詠未羨西隣足槽規長
吉紅蟻玩杜陵綠醉鄉擬續記書眼瞭可讀時康萬戶
春興到七賢竹筵虛艷姬舞面想宮嬪沃別腸驅藥使
健筆命騷僕居然得良朋清辭瀉壺玉習池可聯乘步
兵有餘斛原注步兵廚有酒三百斛誰能酒限拘強效八州督今年
小麥好豈屑官廩麴嘉節迫蒲艾早計數萸菊客中真

有佳眼前喜無俗賦殷金石聲光粲斗牛屬句到後三
三人誰賽六六試編諸賢詩第以伯仲叔共成杜康傳
更聚山中族萬事付亡何乾坤一杯醪

諸君和篇摩壘致師不容閉壁再續前韻

平生周伯仁耿耿空洞腹翛然猿鶴姿豈辦鵠鷹目僕
射不解事居士偶題木種柳僅成五樂園祇可獨皓首
愧商隱湛恩霑漢漉城府百無有丘壑一已足詎省醉
裙紅安識陸樓綠生經未渠諳酒頌聊喜讀耳熱聞秦

聲浪謂肉勝竹高陽有勍者盛氣如曲沃直須殿上飲
撫床徑呼僕競看梳揮金幾欲斗撞玉方丈食萬錢娉
婷珠一斛豈復堪束帶靡徒揖郡督者壽祝老饕嘉名
艷春翹乃知梁州荀大勝伯始菊相逢作青眼洗去爾
許俗冷然曲寡和尚有騎能屬元和一漁翁喜共學士
六吳飲閒雅奏楚優效孫叔石鼎夜未央春空雲已族
何當一會期清歡溢寒醪

酈原解劇飲雅名稱龍腹季倫殺為嬉席妓敢嗔目有

酒何庸辭恐射蔣濟木但當攜酒去明花賞幽獨年秣

未足了

原注孔羣

聖米猶可漉

原注杜惲

愛屐憐猩鬼奪卮笑蛇

足桂漿有餘芳桑落見重綠諫遠衢尊投法置醕飲讀

籌觥進較肴流觴屏絲竹未憂瓶罌罄但費區鹽沃勝

事在園林家務付兒僕

原注陶淵明傳

釀羔截肪乳色鳳泣脂

玉鍊句丹九轉摘文泉萬斛競詆酒中賢抵看帳下督

穿幘俯前案障面厭方麴

原注楊惲語魯漫漢事

吹不落眼花

原注

樂天詩

歸去采籬菊華胥國遨遊無懷氏風俗登詩壇爭

長破愁城相屬二簋用坎四三客敬需六共樂時方清

誰言世之叔相從孟公座寧別輔氏族

原注謂鄭廣文也

一笑

祝諸賢行酌天家醪

原注今內醪上尊扁以醪醪

再和戲黃玉泉

黃公辭酒壚經筭捧便腹讀書飢鳶聲了了崇文目陂
澄萬頃波巢寄一枝木戲題百姓眼自笑孤館獨轍涸
聊相濡神液未容澆嘯歌非彈劍帽隘殊蹙足文織犧
尊黃句弦綺琴綠不見解杯持徒費爾雅讀坐對嬰卧

墻空有葉映竹枯腸但茶搜燥吻遲原注去聲膏沃主人如

馬庾酒使欠猩僕

原注封
漢令事

思折酤媪券欲訪義漿玉喟

茲鯨吸量眇矣龍驤斛靈根日灌溉詩課自程督試當

閱醫經薄釀借神翅共醉靈均絲未問長房菊飲興非

有期衣曬寧免俗杯勺雖不勝嘔泄聽隨屬嬾疊陽關

三肯競臬博六不飲但麥豆頗勝劉文叔醉騎黃犢孫

歸玩墨君族子為評酒名擬號安晚醪

謝葺芷和韻

無詩不言酒

原注荆公謂李白無一詩不言酒

作賦真狂腹未破公子

慳況與佳人目壯心思擊壺聖杯賡咏木

原注樂天咏木曲不如飲

北神聖杯

袖想胡旋雙粧記揺手獨

原注見陳陶獨揺手行

賓筵乏酬

獻醴齊催涕漉禰衡辨搥鼓元崇方病足曾無列屋粉

空韻梳鬟綠百篇謫仙詠十軸蒙溪讀

原注見顧雲池陽醉歌

有

美建安璩競爽淇園竹芒端寒燠轉胃次古今沃卧甕

啖舍郎祭酒可令僕

原注漢僕射中興改祭酒

時陳南北洗頗醉東

西玉雖微醞五斗端有才一斛詩壇長齊盟筆陳巖總

督方將唱銀雲未肯平封麴

原注李賀酒酣喝月使倒行銀雲擲擲瑤殿明陸龜

蒙中酒賦技酒樹平麴封

宮宴看傳柑帝歌須和菊

原注德宗作黃菊歌翰林學士

韋綬奉和

牛心固異撰犢鼻且同俗尊酒日相逢我歌君為

屬歎期踐三五釀頃虧十六

原注樂府庾信對酒人生一百年歡笑惟三五王績

有田十六頃悉以釀酒

酣暢嗟阮修飲狂謝裴叔

原注裴叔則語石崇云飲人狂

藥責人以正禮

窪尊留古製長勺分魯族居然同老襟淺斟醺

水醪

原注湘東有醪水故酒得名

謝鄭廣文和韻

鱸堂心醉經精神應滿腹溫飽非所志飲食不以目

注原

溫公謂今人以耳而衣以目而食

說詩稱解頤善問待攻本頗愁百斛

量孔庭惟立獨俎豆答衛問筐瓷欠鄒漉

原注見鄒陽酒賦

曾

子非養口漆園且尊足時於清夜分酌以翠勺

綠原注

翠勺為君斟酌

聊澆磊砢胸不廢吾伊讀每篇亦作句

原注君來詩

每篇必有亦作語

如對記書竹相逢蓋初傾一別桑重沃融尊

慚坐滿魯餽踈拜僕衛生不自寶抑首親患玉囊無諛

墓金米乏佳傳斛厨煙爨人清蔬果園夫督粟鉸收秣

田黍釀用陰麴解同杜陵襟期醉昌黎菊赤手當縛菟

原注來詩

有白戰之語

白眼謾嗔俗莊虛左氏宴觴肯西子屬酒債

負尋常會期遭百六要須中聖賢庶以展伯叔醉入無功

鄉醒起屈原族

原注漢徒屈昭景大族

岸幘一笑粲共賦醪酒醪

贈已訥二老軒

原注青山惠安寺

吾聞墨者徒設教本魚愛釋伽弘其源方識宇宙大河

沙與寶塔平等了無礙夫何佛法衰涉晉唐五代祖師

南北分鼻孔爭譎怪傳流各衣鉢紛紛辨宗派爾來三

百年涂轍日以隘教律復異門禪機亦殊解訂以大小
乘森若立矛介虎豹自狎搏蛇龍相噬喂駕空樹金碧
爾汝別疆界蒲盧學抱子嗣續植根蒂蝸爭競蠻觸夷
樂騁耽佚裘屨無貳顏楚越隔肝肺天殛苦羈束心甯
堅莫壞之人良可悲賢愚固難概誰知已訥公粲粲發
眉采少年摻袂游瓶錫徧湖海是非不關耳窮達付長
嘅晚歸耕石田禾枯將種稗唯有舊家山青眼終不改掛
笠寄清樾編茅客欠噫目之維摩室而無天女在謂是

龐公居似欠孔明拜強名曰二老當索形骸外泉石日
幽雅松竹森蔚舊軒窗抱巖壑骨次絕瑕類睡起聽粥
魚微雲初霽霽宴坐圓覺場忘言默相對二老容于軒
須彌納一芥捨軒求二老怒風號大塊軒以二老名未
免蛇足畫請更以不二免為軒所賣我為說偈言聊以
贖詩債

東湖

誰將東湖光斂作大圓鑑千峯就妝束萬象互窺瞰紅

消日脚明綠淨山影蘸我來一登臨扁舟聊可纜

次抱拙妾薄命

落花流水何紛紛三分春色二分塵黃鸝遶樹戀不得
蝶蜂浪作花都巡昨日繁華今寂寞飄零多屬風雨晨
金谷無人粉香死錦踪繡跡俱成陳世人重花不重葉
林園自此無精神東君年少時酷愛枝頭花庸奴桃李
妾姚魏滿蹊未數黃娘家一朝棄背春風老懶踏長門
堦上草芳菲特暫歡顏色不長好白頭事人那可期不

堪重賦章臺詩

和鄭制幹謝借居且惠朋樽醉螯詩

平生愛山林里居想王屋孤月自無朋斷雲曾不族詎
知嚴遵市條有賈誼卜西河就索居漆園問尊足翟門
羅可去軻宅仁已熟似聞結駟多每見後騎屬魯臺時
遣餽監侯已發粟競懼王儉蓮肯問顏公粥家貧願鄰
富鶯葭欣倚玉頗容滑稽叟來邁堂上燭猶能辨絲簧
漸近不如竹濁醪恩嘉醞庸行參聖讀願為善頌禱既

醉備五福謀婦擬提壺敲門驚啄木持螯兩從事來就
桑下宿美味均適口雙明喜增目命駕匪千里星言媿
不夙聯句乏追韓補詩聊繼束終當效樂天駱馬為酒
幣

拙偈調偃谿上人

昌黎先生入山裏大顛牢把數珠子松下經函着淨瓶
照管習之翻却水丞卽滿擔江西禪行行勘辨鼻撩天
偃谿爛嚼雪窻紙換却舌頭別參起

贈許石田為僧

平明對鏡良獨難子能脫屣彈指間戲視此身如髦蠻
冠巾擺落逃濡關千鈞强弩一笑彎萬錢買盡江南山
厭渠世路車輪殷赤脚健倒蒼苔斑參寥佛印若是班
江湖風月不汝慳汝狂方醒衆所謹我獨見之為三嘆
辨詰孔釋語可刪白雲深處輸君閑

靈隱慧上人惠詩為古風以贈

貫休齊已唐詩人當時逸氣凌簪紳聲名疊疊遍甫白

幽蘭直與梅爭春誰知北面石霜老服勤杖屨皆終身
二公所得當蓋世英詞傑句風中塵至今傳者以詩重
妙處反為詩所湮弄翰戲墨雖佛事炊沙作糗成飢嗔
不欲詩工與字巧緒餘能奪道之真心宗一了萬法具
辨才飛轉陶家輪君不見阿難多聞及辨慧咒語要敵
摩伽神

乍晴觀蜂房戲占

蜜蜂家計千頭奴日併花課供蜜租粉紅黃白各本色

擁腫雙脚尻為車採花歸來不知數一一到門如合繻
方春乳房湧金屋子弟分王遣之國廣輪處處成甘州
饒口齎嚙不遺力蜜脾割盡到蠟膚畢歲辛勤用謀食
秋深冬早未見春喫芳咀華來藻蘋釀成餽糧香滿室
日日飽衙知愛君問誰食蜜還主臣阜財富國今何人
和葺芷筍詩

我貧每笑齊之獨晚食雖甘未忘肉梅肥尚餘風折綠
溟滓餐英命騷僕蒲籬別彼羝角觸送似玉堂如楚東

惡詩聊賦徐凝瀑妙句飛來漱鳴玉曾無導吏隨賈餗
坐遣跛奚委葵菽茁芽勤視緣坡竹期飫伯仁空洞腹
書腸膏腴士之辱得魚不敢餉羊續要知菜味勝山谷
步趨強顏髮曲局盤有美茹無不足陋矣王芻箋淇澳

田家

老農喜說田家早缺月踈星穿木杪洗錚鏦草作晨炊
麥飯嚙甘蟲食蓼兒牽秧馬婦攜笠泥滑不嫌春雨少
平疇拍拍水連堤姑惡數聲天欲曉

水急船行頗遲

湖流湍駛欲下瀨舟人挽牽如蹶張空令百丈重牛首
如何萬斛浮龍驤進寸退尺天未定暮四朝三風作強
遲明檣烏幸西望看取快箭激脩房

重賦章臺

楊花滿地飛蝴蝶釵梁露濕羅衣怯臉痕玉潤拂紅膏
顏色如花命如葉鯉魚風起蒲葉香鶯啼燕舞春日長
墮紅殘萼斷君腸悞逐浮萍轉零落自古佳人多命薄

畫馬圖

房精夜隕渥洼水中有天馬變如鬼
籊雲流赭登玉臺
清風謾謾生雙耳無端遣入天子閑
足底百趼如關山
隔河唐將浴牝馬哀鳴頓足將奔還
風毛雨鬣不自整
肯顧苑北雲錦斑但有風稜餘瘦骨
竊銜不管霜蹄蹶
大星昨夜落旄頭好載關氏媒突厥

舊冬得萼蒿數十根植之舍傍今春
遂可採擷
輒持班黃堂拙語先之聊發一笑

萋蒿見錄爾雅篇族譜系出荆楚孺居人採擷不論錢
橫道躡蹠如車前物有貴賤所遇然難壅承苓以帝言
世間何由正味焉嗜艾昌歆性所便冰壺先生鑿窞傳
敢驕玉食輕膏羶天隨酷謂杞菊賢一賦金石聲相宣
玉糝羹芋稱蘇仙天上酥醅能比肩憶昔客授湘湖偏
乍逢此蒿口流涎嚼寒冰玉香滿咽紺滑琉璃鳴貝編
糝以豚膏軟如綿脆甘豐膩潔且鮮天花石耳羞爭妍
木雞退飛山之巔笑渠茅蕨成兒拳岸視棹圓眉宇軒

七菹五菜誰敢先獨能兄事王版禪一別楚產知幾年
孤根竭來植鄞川春苗出土含曉煙援條小摘喜欲顛
故人千里方言還調笔酌之雙觥船枯腸慰滿藜苒緣
食芹而美不敢專遣送兵厨羞瓊蘂噴飯一笑質管邊
靜樂用元韻為勸學之什再和

士惟食志非食力於陵奚事親屢織靜樂一門自師友
簞進不為子貢息元仲季方從太丘海內人士俱願識
案上惟作羽籥聲室中定無鉏耨色中旦督課如園蔬

子夜程書過衡石舉似翁姬答其兒教育英才笑安得
文獻超羣王謝家韋布當磨鐵硯墨

再和勸學韻

仕學優於服田力公儀之家廢葵織詩書為府道德林
樂在藏修洎游息濃薰班馬有餘香暗模曹劉豈難識
挿架牙籤映隙曛近竹芸編侵晚色諸生競詫邊腹笥
正音如聞孔堂石從知車馬自稽古須信熊魚可魚得
四科褒進惟尚賢欽想昌黎方讀墨

碧扇行

冰蠶吐絲青唾茸天孫轉機聲隆隆帝家初裁新樣月
蒼然正色摩寒宮一朝飛隨烈士手九闕自此無剛風
乘鸞女與蒲葵翁癡翁駿女誰為容吳剛斧頭紅玉篆
并州剪刀快如箭化工持此天然巧古壁團團照君面
長安四時生麴塵馬頭搖曳春風轉君不見醉李白窮
杜甫當時西游乘蹇驢太清獻賦動梳冕脫靴笑視將
軍奴奇哉二子真坦率朝暮貫酒黃公壚游蓋飄雲手

遮日未省有扇如清夫清夫扇子僅盈尺買斷清風歸
嘯廬何物元規敢相污醉中祇恐李杜呼我當吮筆和
墨喚起文與可把君畫入李白杜甫圖

適得滴蛤頗佳遺餉菊坡因記曾作蛤子詩有
文身吳秦伯緘口魯銅人之句戲綴前語代簡

文身秦伯甘斥鹵緘口銅人舌微吐借資墨客富濡沫

原注滴乃
墨魚之濡

骨醉唇香登燕俎半熟含酒老饕賦此翁僅

可闔堂戶班班雋永帶神液入室真味翁未覩菊坡風

裁黃豫章如食螭蚌江搖柱盤餐盡廢太瘦生格遠調

高自清苦子蛤遣汝到眉桉努力去為酒中虎

原注謂稱海錯

醜者為捉酒虎

未下醜豉有何好猶侶尊羹傲傖父海之介夫

此小兒難肋見笑楊德祖前身曾作水解仙飛入珠宮
飲甘露能令齒吻策餘烈一鼎松風漱寒乳

客有誦袁蒙齋得雨酬倡之什輒賡元韻志喜

也呈虛齋使君

雷伯四月瘖無聲鳴鳩呼婦鳧浴晴星如撒沙燈吐紅

義和駕鞭乘赤明稚秧針水未入種秀麥浪畦猶督耕
香車不動百龍蟄轉轆如織千蛇橫愛民太守心語口
瘡我以旱寧無生川靈有知龜亦許異物蛇蜒歸掌撫
一雨果從方寸來此念端誠本天與但看父老歌豐年
不用兒童學皇舞弭災肯效藥巴喫哺民無異紫芝乳
一年事在阿堵中四封笑溢迎門語我州瀦野同淮徐
公方有意六輔渠上天下澤鍾惠施千里波及皆君餘
蒙齋詩成虛齋和我樂賦之如遂初坐對聯珠飽官粟

但有歡喜無歎歔祇今快續二賢詠不須乞米移顏書
育王老禪屢惠茗比又攜日鑄為餉因言久
則味失師授以焙藏之法必有以傳之笑謂非
力所及漫成拙語解嘲錄以為謝

曾讀茶經如讀律一物不備茶不出未論煮瀹應節度
第一收藏在堅密摘鮮封裹頃焙芳濕蒸為寇防侵疆
朝屯莫蒙要微火九轉溫養如丹房育王老慧老茶事
新授秘訣乃如此幾番惠我先春芽竭來細問茶何似

我初謂師茶絕奇十日之後如飲糜頗疑緇俗果異撰
良苦輒為居所移吾言未終師絕叫為茶傳法恨不早
綺疏應合有司存料理如前母草草對師大笑喜欲譁
三年宰相食無鮭長鬚赤脚共井臼荒寒政類山人家
虞庠歎盡瓶笙吼何曾敲雪春雲走不如時扣趙州門
侍者可人長摸首

江湖後集卷五

欽定四庫全書

江湖後集卷六

宋 陳起 撰

鄭清之下

賜第登樓

避俗懶成癖登樓睡失魔忘機鷗自下開檻蝶相過高處景差勝靜中春更多君恩何以報歸夢欲如何

戲調長鳴鶴

瘦鶴雲霄志相從伴獨清可堪三徑寂頻作九臯鳴博

字輸鵝頸橫空避雁聲
終辭華表去汗漫逐騎鯨

覺際間行

斜逕轉山腰平疇露稚苗雲低松挾長雨足浪宣驕
宿鷺翔孤嶼歸僧睨斷橋倦餘成小立新月掛青霄

三月末泛湖

半晴陰更重乍煖冷猶爭
墜葉蒲芽綴新萼荇面生鐘
聲帶雨澀帆力貯風橫
客至雙飛鶴歸歟茗可烹

食蛤戲成

滿殼濡潮汐因沙產海澹文身吳泰伯緘口魯銅人雀

化宜分雋蛙烹肯擬倫

原注蛙大者名風蛤

試呈饕餮手半熟酒

含津

菴前徐步

小橋街石路安步水之湄浪蓋菰蒲伏寒禁笋蕨癡蜂
房深戶牖燕壘漸塗茨過眼春餘幾延緣歸思遲

書齋獨坐

避事寧違俗端居悟及身頽泓供媵御方冊替親賓室

閨月聞入庭空花自陳所安惟適耳誰復辨秋春

東歸越上

急雨先聲入芰荷傍船魚躍弄新波東西黑白投林鳥
高下青黃異畝禾村豎相呼騎犢背小舟斜艤問漁蓑
秋來物物供吟筆不着黃秦可若何

桂花

香粟飛從月姊邊秋花無數總饒先清芬肯作椒蘭觀
雅韻羞陪粉黛妍點就金丹篩雨露染成玉骨跨神仙

餘芳更孕青青子相伴寒梅到雪前

金峩途中

石路縈紆水遶村酒帘深處見柴門橫塘樹密鳩携婦
老屋籬深犢有孫麥荅菜花成錦繡筍芽薤甲當雞豚
竹輿莫作追程去半似桃源欲細論

奉題蜀邸五雲西岷峨保障

西望岷峨天一方誰教地險絕遐荒皇風已喜渾無外
國勢那須別有疆黃鶴盤空飛不過金牛拔地去何長

漢庭四海皆臣妾一曲歌風未忍忘

小軒偶成

齋餘宴坐息深深萬法皆閒境會心輕浪颭荷珠溜玉
晴曦穿竹翠籠金岸頭舟楫人歸語檻外菰蒲鳥去音
謾說陶車并謝屐如如不動勝登臨

村邊以湯婆樣惠示與詩俱來依元韻

惠中秀外更清便姪姪嬌羞二八年無奈畏塗生衽席
寧教寒夜折冰綿遣來勸嫗知君狀擬伴涪翁到曉天

只恐翫花陶學士風流未老續膠弦

戲占

橫塘雨過水初平浪影窺窻一孔明
籬下觸羝五鹿角林間反舌百禽聲
柳公權可送行客梅子真能寬渴兵
誰道夏園如所有蓮花端可傲張卿

比以拙詩戲調張籍不知作者已盈軸矣輒和
兩韻

展也虞朝庶績熙合修厥貢豎熊羆兕容于野雖非地

豹澤其文似識時毛革正須供有用血牙安事殺為嬉
國僑惠政人誰犯虎聽多應謝子皮

號虎寧如龜有知陸行端自觸危機縛渠呂布還須急
驅以王尋謾失威肯使黔驢呈短技直教獵騎合邊圍

惡盈詎必分人獸猛獲終擒自衛歸

原注宋人請猛獲于衛石祁子曰天

下之惡一也云云衛人歸之

因會

原注古外切

來詩再賡元韻

組練橫陳壯士貔想因羽舞去窮奇千山白髮存公道

十日清吟費老詩待伴易銷春有脚交光最勝月如眉
只愁無著梅花處東絹平章付伯時

續詩之寵依韻以謝

莫搜險韻續獼獠雪景須知雪後奇日絢寒光莊淨界
梅將真色薦新詩試敲折竹煎茶舌旋覓遙岑出黛眉
油幕輸君談笑樂聖杯正是一中時

題雪竇千文巖

並海危峯駕六鼇招提深處綠周遭樛松直上睡龍起

怒瀑飛來風虎嘯坐向亭空雲作伴待看身與月爭高
山靈意我酬清賞為酌水泉讀楚騷

思鄉味戲成

隔籬野園桴眠犢帶雨村春雞喚雛旋熟黃梁留客住
滿甕白酒倩人沽未諳旅況三分在早覺藜腸一半枯

寄語吾鄉譜鮮子

原注朱諫
之有解譜

莫教辜負脆皮鱸

除夜求屠蘇

椒盤為計定春前客裏那知歲籥遷行路問闌穿履雪

薄官羞澀看囊錢媿無黃帝屠蘇酒試謁淵明種秫田

原注德化彭澤鄉

令尹可人應拍手從教滿意作新年

贈陳童子

前身端合是王充收拾羣經貯腹中書吻可能如布穀
筆鋒應不事雕蟲看來眉目真蘭茁攬取詞章作繡筒
歸去莫誇童子技好尋芳躅到蟾宮

山行

山行心迹已雙清驟見清溪眼為明鬼谷洞前符竹在

觀音巖下鮑魚行宗師宴坐空餘石龍女分流不作聲
人影交橫到林薄綠煙深處一猿驚

正月六日早行松山道

五更河鼓尚橫陳小立晨光漸可人日出野雞猶唱曉
雪晴山鳥競呼春溪筠拂袖霜花落石路支筇蘚迹新
慚愧明朝江國近買魚沽酒祓征塵

送行詩

中年別意增懷抱昨夜秋聲到客船流水孤村鴉好在

平沙遠景雁依然惜無繡口供吟筆只有萼羹愧昔賢
付與西湖林處士重陽健倒菊花前

半生霜鬢飄萍迹幾度風餐繫柳船舞詠未忘雲里在
去來翻似賈胡然先生自是今和靖林下端能友士賢
二畝孤山應更好瘦梅疎影小春前

山房秋日即事

雨後鳴湍走碧溪水聲秋意恰相宜窺蟬螳臂方裊甲
啄蚓雞羣競濟師初月掛簷窻未覺新涼入牖簟先知

西風早已催征棹管領尊鱸入夢思

失驚牆外已飄黃屈指秋來十日強暑冠負頑猶出沒
風師未壯且翱翔橘色捧腹微藏葉桂蕾呈身只欠香
掃盡暮天疑浴罷半眉淡月畫新妝

稻花經雨已脫白楓葉未霜先借緋入紵蚊牙千計巧
掛簷蛛腹十分肥田翁看水攜鋤去山婦臨炊抱蔓歸
唯有詩腸無一事隔溪數盡暮鴉飛

晨興散步

軟紅銷盡利名疆興到湖山取次行萬馬拍堤春浪起
一龜曝日曉峯橫客中寢飯根塵寂雪後松篁意氣生
身是定僧無欠贖惟餘雙鶴報寒更

僧居西畔鶴居南我向中邊住此菴歲晚結交松莫逆
老來知味菜分甘禪心每日閑中得世事新從夢裏諳
隱几空明香穗斷淨揩雙目對晴嵐

晚歲知非遂伯玉前身作脫戒師兄青山不灼利名火
白髮能銷忿欲兵境對虛空全體現眼無揀擇內心平

曉窻醒寂闕何事到枕清鐘一兩聲

食後閑步

乞得閑身入釣臺柳眉舒盡見桃腮
山中歷日花開落物外交朋鶴去來
更展書窻延竹影賸翻隙地長梅栽
春寒無賴欺霜履健倒應愁破綠苔

同黃制屬自延壽寺雨過禪寂寺

復

原注
平聲

輿掠雨到僧門帶得清閒一二分
素喜堂中無

偃月榻來寺裏作穿雲赤心莫逆唯松友
青眼相看有

竹君燒葉更聯東野句
紙窗鎖隙候晴曛

偶成

五物中間著一翁
園廬隨分可支筇
章施采服花粧露
戛擊鳴球竹嘯風
疎種密栽觀木漸
淺流深浚養泉蒙
眼前丘壑無佳句
自哂詩腸苦未窮

祈晴行西湖上呈館中一二同官

踏盡紅塵挹翠巒
江湖清夢入雕鞍
濛濛薄霧渾疑雨
惻惻疎風不是寒
野菊頻催花事早
老楓初試葉聲乾

恰知病骨宜清景恨不浮家學釣竿

曉色窺林半淡濃亂鴉飛去水漫空山橫孤霧殘霞外
秋在微雲疎雨中官事却能成勝賞詩壇端可策新功
吳儂浪說西湖景蓬觀今逢蘇長公

偶於圃中問訊梅友老榦數枝疎花初放有足
喜者率爾有作

洗出金灘鎖骨沙種成老樹競槎牙冰霜歷盡肌生玉
牕牖寒深影到紗舊歲枝頭新歲景十分好處一分花

誰言冷圃惟秋菊春意撩人乃爾邪

宿翠山

篴輿十里見青嶺行盡松陰得翠巖萬壑聲中清磬出
一峯高處白雲緘茶新煮鼎作魚沫僧有可人能塵談
自覺靈山緣竟熟佛禪重問後三三

暖風依日佐山行幾許春隨屐齒生溪舞綠雲苔出沒
田翻翠浪麥斜橫閑中適意榮三事歲晚無年式耦耕
一靜可能銷幻藥剝開胷次看崢嶸

旌德觀

瀛丈移從弱水間
君恩泮奭得躋攀
茗香壺酒成三事
巾褐枝筇佔獨班
境勝亦能充道勝
官閒何似在家閒
玄都猶有桃花在
更向西湖訪好山

綠蓑青笠慣菰蒲
錯認東湖處士居
舟尾笑迎車後客
渡頭催買網中魚
水程趣戍半規日
山意論交千卷書
歸去重樓試凝望
恍曾雲氣矗凌虛

余識頓雲岑已三十年
晚居覺際又八載矣
近

因山行疑接談塵偈語奉贈

嬾把無生話更參月移梅影到枝南身心識破夢中蝶
頭角老來春後蠶笑斲野泉畦露菊巧尋煖地圃霜柑
蒲團睡足書遮眼貝葉叢間會孔聃

調雲岑

戲將鷗弁博緇衣般若叢中瞋作癡鵝頸肯為羅隱笑
鷄林能辨樂天詩好從休處求安逸莫向閒中覓住持
覺際湖山最佳趣藕花洲渚菊東籬

因林治中近有捕虎之役調以拙詩

豺狼當道實堪嗔就乳於菟哭楚臣
馮婦下車宜衆說將軍射石見心真
渡河應避馮河勇搏獸終歸舞獸仁
他日朕虞須命益九官濟濟定相親

余自東山往金莪住山戒師迎於中途到上方
泉石幽勝有心匠助天巧者因成數語以贈

一壺鳴瀑寫天紳怪石鯨奔欲化鱗
靈隱飛來真相後

原注真相乃金莪寺類

老坡重證戒師身居山活計今成趣造物

工夫總待人自喜愛閒逢勝絕杖藜端不負殘春

贈談命陳總屬

彈鈇朱門歲月過生涯安樂徧行窩談天有口機關別
處世無心笑語多自是君平忠孝在其如曼倩滑稽何
一帆又作鴟夷去遙想江湖聽踏歌

三友

松號大夫交可絕梅為清客志相同
英英鳳實卑餘子楚楚龍孫過迺翁
晚際一弓橐素月署中千斛糴清風

小軒正欲供晨坐付與遮欄曉日東

遣興

舟車覆卻萬變人雷動靜兩忘蟲臂聽渠得失羊腸何
異康莊

出市得鰕魚成六言

長鉞歸來有魚狀似松江之鱸為向東坡傳語醉卧黃
公酒壚

觀史有感

家令身危侯國計洛陽護擯涕流書都門祖帳何功德
千古徽名說二疏

晚晴

濯翠篩紅獻晚晴為渠日脚護歸程碧雲四合如相妬
纔剩西邊一縷明

覺際偶成

自愧端平村宰相今為安晚野堂翁君恩全付閒身世
山水從容一笑中

覓桂花於夷陵宰

月圓仙人試道粧風流六一舊琴堂遙知鼻觀盈秋馥
乞與冰曹數粟香

東家竹屋最窮空不識簷花落雨中笑遣吳剛揮玉斧
解令冷舍作蟾宮

謝送桂花

金闕真黃入靚粧仙葩何事到鱸堂只緣風雨要人甚
寧取旃林百斛香

道眼如如了色空維摩方病散花中杜陵有酒勤相覓
留埃清齋出梵宮

自嘲

我亦逢場因作戲要令竿木自隨身老僧不學面壁觀
山偈隨緣舉似人

感事

退之硫黃藥成疾伯仁金印恩為讎眼前世事盡如此
十日峭寒春作秋

鳳栖方杖

矮伯老於周柱史瘦梅青似楚離騷推窗欲覓登山路
無數青苔落鵲毛

晚景

斜照染成金色界嫩霞蘸出水紅天箇中買得皆真境
不遣詩人賞一錢

一巖

一巖洞空掛雲山巧印穹蒼半壁環只為廣寒宮殿遠

故留闕月在人間

虹出

輕紅淺翠抹弓腰
高映斜陽跨碧霄
半似一條瓊玉帶
合成五色水晶橋

讀虞美人草歌戲成

心似合驪因恨結
眉如別柳為愁彎
樽前舞影風能偃
爭奈當年力拔山

太史報彗星沒

老彗妖芒欲蕪天王良見迫為收鞭紫微一夜璣衡轉
甘雨祥風到野田

旌德觀

半生東角數間屋一日西湖十首詩回首風光少年客
春山擁翠作蛾眉

調雲岑

佛法方當惡劇時偃溪笑裏袖鉗鎚不教管領千雲衲
打徹頭關更問誰

聞蟬

人行沌口三程路
蟬作陽關第四聲
待到日夕蟬歇處
無端促織替渠鳴

紀龍井上所見

搖曳輕陰幕柳堤
塘日暖漾鳬鷺
無端崖下鳴榔發
飛起一聲過水西

梅

粉面芳心碧玉裳
特來宛作故山香
征途不覺春如許

更問蘭芽幾寸長

戲作窻蠅詩

曾記窻蠅古德詩
笑渠未有出頭時
驀然撞破窻間紙
透出虛空未是遲

清明有感

井泉槐火幾清明
白髮紅顏管送迎
榮落智愚千古恨
一時分付子規聲

觀王導傳作

江東老子惠之和九錫牛車愠蔡婆不殺伯仁君信否
澹然推分意如何

食豆莢

西風撼撼草蟲鳴萬莢叢中詫瑞冥
煮啖快輸兒女吻
燃箕不忍尚堆青

蓮房洗硯

圓長已褪青雲子芳軟猶存綠玉房
留伴陶泓共新浴
要令毛穎沃清香

小憩上卷

竹邊深靜納新晴
瘦策徐行足力輕
曲檻負牆塵不到
游蜂時寄採花聲

題東山上方

謝公雅志在東山
一入黃扉不復還
公去我來山屬我
為公償却半生閒

題偃溪聞長老堯民擊壤圖

炊煙萬井著僧居
人在康衢畫不如
寄語偃溪灑淡墨

圖中添我一柴車

泊黃檀

夕陽茅屋占江干
風斂炊煙作暮寒
閒看月光牛背上
畫圖添我一檣竿

玉泉觀魚

金鱗玉翅舞連漪
雷雨休言變化遲
尺水能開千里潤
看來端的是龍兒

謝童天老秋蘭

楚畹春曾汎曉光直留雅艷到虹藏
山中不把一枝到
世外那聞千佛香

秋色追隨入慧光肯攜幽卉問行藏
深林未省炎涼態
來為閒人特地香

綠葉青青

原注音菁

帶紫光

原注經有紫金光聚

拈來笑處沒遮藏密

圓應具楞嚴偈非木非空出妙香

湖風不順

推蓬滉漾失船踪萬頃玻瓈在沱東
政戀湖光挾山色

知心龍伯贈橫風

聞覺際被風寄頓老

古德把茅惟蓋頭
颼風飄屋等虛舟
矮窻猶有蒲團滑
也勝床前衮雪毬

南坡口號十八首

十日南坡兩日晴
時時不放日華明
春光似妬閒人佔
端的春風飽世情

天工忽忽度年光
料理人間富貴忙
閒裏何曾關造物

一分風景亦收藏

誰將春晚作冬看
添着綿衣減却難
道是麥寒猶未
在
願渠麥熟且禁寒

休言無地起樓臺
十箇花窠沒處栽
東近北鄰西近水
且教紅白面牆開

欲識魚梁試作

原注則箇切

看輕拋野淥罩清寒
幾回澆起

空無物輸殺羣兒下釣竿

吾宗孫子喜相過
一笑檀欒似樂窩
且向尊中陪北海

直須閒裏識南坡

酷愛鳥鳴山更幽
墻陰風雨但颼颼
筠籠買得春禽語

不會憂時也白頭

原注並得白頭翁善鳴

管絃不礙登山屐
梁肉何妨滿腹書
豈是清談愧夷甫
為無阿堵遶吾廬

試向清池放小鮮
洋洋圉圉忽攸然
校人真箇知魚樂
殺活機鋒總是禪

分席春畦僅一弓
靈根移自石窻東

原注五味子生於四明山

饒渠

五味誇仙藥，爭似鹽梅正策功。

紛紛造化信多才，果解分風作去來。
我向南坡一句雨，春陰今曉為誰開。

小窻白醉篆香遲，只有書君伴燕頤。
料得人間無此樂，殷勤獻與定牢辭。

枝筇掛起一句彊，剪剪春寒到柳塘。
白髮不公欺老我，偏於閒處引風霜。

記得兒時誦古詩，其甘如薺謂吾欺。
淡交休恨相知晚。

攜向晶盤笑殺伊

原注 牆根
春薺 怒生

曉來兩鵲屋山鳴報喜多應只報晴似為東皇傳好語
故留勝賞到清明

舊日都城飫子魚一鱗今不到茅廬果然額上通三印
盡去侯門代鯉書

安晚生涯冷似灰別墅經營半月迴誇與兒郎翁驟富
詩囊盈握送陳雷

紅紅白白共支榮怪底山茶有寧馨倩得司花來判斷

不妨一姓養螟蛉

和虛齋勸農十詩

迢遞層陰曉自開
僊舟花底問瀛萊
文章太守非遊行
爲省春耕特地來

藝天妖焰彗初沉
朝汲仁賢簡帝心
未用鋒車便脂牽
小須千里徧春霖

蔽日寒雲悄欲秋
仁風載路曉光浮
田翁攬抱兒孫笑
竹馬橫陳未肯休

問訊桑麻真郡政
按行松菊似家山
挽回和氣歸田里
只費齋鈴半日閒

暇日碁書六一翁
錦檣絲轡與春逢
年時豹尾車中望
山色有無知幾重

曉夢吟成望帝歸
征鞍未許柳絲知
笑聽鄮嶺春禽哢
去博延英午漏遲

醅顏醉客玉西東
半濕塵衫上翠空
鄮谷雖寒應解黍
朱車面而是春風

小隊旌旗半道歸松陰緩策攬清暉女郎未覺寒惟過
笑語相教著嫁衣

老黥山靈具六通解將蒼狗護奇峯虛齋自有青囊眼
卻笑景純書未工

恰好農時踏翠煙睡龍驚起雨公田官程便作乘閒看
不用扁舟學計然

三月二十四日自東山到金峩一宿而歸偶題
壁上安晚居士自覺際航湖入東山道金文意

行至此淡晴輕冷風策策有聲草樹清幽泉石
雅潔如在天竺靈隱間深靚過之既暮假榻瀑
通夕喧枕始印魯直夢成風雨詩弼魚鳴展鉢
而去因筆一絕

橋石天台水谷簾峯迴秀擁更深巖我來便欲魚忘世
少立清風為拂髯

和白雲老禪二偈

閱盡恒河水上波聲塵何似泡漚多還師拍板鉗鎚後

更唱誰家別調歌

簷鐸吟風月半凹黃金布地欠誅茅三更出日真光景
大好欽身正笠色

戲嘲杜宇

呼晴不似鳩知務報喜何如鵲愛人有口自鳴誰禁汝
亂啼何必待殘春

游松山溪塘晴日蕩漾

紅染花梢未是真一川晴綠最關人誰知屬玉雙飛處

占斷西湖幾許春

漁舟

明月清風佳釣船
新秋世界落詩編
漁翁若遣騷人作
原注去聲肯食人間一點煙

即事

微雲疎雨一分月
折葦枯荷強半秋
猶有遠禽飛不盡
急翻孤影暮江頭

別僧

欽定四庫全書

江湖後集

高

溪邊風景遠且平
頗似江鄉雙眼明
柳風淅淅荔日淡
計取生還第一程

頗上人持瑩蘿月五詩見示因走筆和韻聊禦
睡魔

蘿月禪機莫強猜
如來無去亦無來
霜凝寒綠歸松鬢
春染輕紅入杏腮

須彌境界含方廣
芥子中間見福昌
但使有船堪載月
不應無佛漫留堂

竺乾心法拈花笑洙泗家風鼓瑟希
一問已應居第二
更詢來處落三機

三更日出行千里
百尺竿危到幾回
遮莫分身兜率去
聽從路滑石頭來

病著心華須佛治
老僧眼顯要經遮
勿逢蘿月五禪偈
絕勝盧仝七椀茶

賜第登樓

桃李漫山不是春
紛紛蜂蝶趁遊人
梅花已帶春歸了

分付垂楊浥露塵

病思歸心走兔迹自嗤幻境未渠忘并州便作咸陽看
設若桑乾亦故鄉

登飛來峯

懸崖石路擘蒼苔川竇巖扉處處開信是拔山人有力
一峯擗碎總飛來

濃綠中見芍藥一朵

杏桃結子已成翁稚綠中間著老紅階藥元來如許壽

麥秋天氣露春工

夜雨

依風急雨墊秋清
踈數無時總有聲
最是可憐雲裏月
幾番雲翳幾番明

花間見蝶

粉翅縈花幾度忙
惜花長是為春光
爭如箇箇蜂鬚上
到處分甘作乳房

天育二老禪惠示經佛偈答以十詩

二老毫端一滴曹喚醒寐語沒叨叨更無慧可安身處
作麼當時立得牢

餘塵明極強分離菩薩如來是阿誰既道本來無一物
將何芥子納須彌

龍宮海藏自分明搥搥灘頭一任傾因果若還終不昧
政須防作野狐鳴

書經猶有遮箇在盡佛何曾夢見來玲石玉峯雷雨過
梅花昨夜一枝開

三經已是太多羅州去休休更問婆箇裏幸然無一事
何須終日把旣磨

四千劫來閒坐休忽拋長舌鬧藍頭若言面壁為心法
瞿老還須第一籌

懵懂維摩不二門畧無遺囑付兒孫普賢若匪剛饒舌
此事如何更吐吞

老胡無聖亦無言薦指虛空喚作禪掌血條痕無著處
誰教白地患青顛

般柴運水老龐禪佛法無多在密邊餅汝將來還與汝
因師交點更團圓

生老年來病已深灸癰著艾復難禁六根四大元無有
何處求師下一鍼



江湖後集卷六